

Alfred Hans Mühlroth werd 90 Jahr alt

Es Hemweh hat ne zruck getrieb

Die Pipatsch-Leser kenne ne unerm Name Vetter Fredi Mühlroth, er hat schon vill un Scheenes for uns alli gschrieb. Zu seim 90. Geburtstag (am 17. Juli 2020) wünsch mer em Vetter Fredi beschi Gsundheit, Glick, Zufriedenheit un noch vill Schaffenskraft. Meh iwer sei Lewe erfahrt ihr, liewi Leser, aus der Banater Zeitung vum 15. Juli 2020.

„De Mensch macht solang er lebt!“

Weil mer sich in dere wirri Zeit nit naner ufsuche soll, tut mer halt mitnaner telefoniere. Un so wees mer, wie dass es uns geht, ob mer gsund sin. So war des ach doneilich, wie ich vun Temeschwar aus de Vetter Fredi in Lenauheim angeruft han. Es war e stark intressantes Gspräch, obzwar ich schon vill gewisst han, is noch so manches derzu kumm:

„Es kummt mer gar nit

zum Glaawe, dass jetz schon 30 Jahr vergangen sin, seit ich mit meiner Frau Lenauheim verloss han un uf Deutschland zu de Kinner gezoo sin. Ich sin stark schwer fort. Weder meiner Frau noch de Kinner han ich gsaat, wie stark mer die Heimat fehle tut. Wie dann awer mei Frau gestorbt is, vun selmols an is mer nor noch eene Gedanke nohgeloff: ich will zuruck, hem uf Lenauheim. So sin ich halt erschter immer uf Bsuch gfahr. Bis mer uf mol, es war grad im Hei-

matmuseum, die Idee kumm is, for immer zruck uf Lenauheim zu kumme. Es Haus meiner Schwester war leer gstann. Des han ich kaaft un scheen hergericht. Do sin ich jetz seit fascht zehn Jahr wieder derhem.“

„Wann`s mer zammgeht....“

Mit was sich e 90-Jähriger die Zeit vertreibt, des hat de Vetter Fredi ach während unsrem Telefonspräch verrot:

„Wer iwer 50 Jahr lang in eem Ort, immer uf demselwe Platz gelebt hat... des kann mer nit vergesse. Un es tut mer gar nit leed, dass ich zruck in mei Heimatort kumm sin. Do will ich bei meine Ahne bleiwe, ihre Gräwer ufm Friedhof bsuche, an se denke un for se bete. Wie ich de Tach verbring? Mit Schreiwe, Kloppe un Spaziere. Ich geh so vun eem Haus zum anre, es intressiert mich, wer jetz in de ehemols deutsche Heiser wohnt. In Lenauheim sin jo nor noch 17 deitschi Seele. Des anri sin Ungare un Rumäner. Un wann`s mer zammgeht, will ich ufschreiwe, wer in wellem Haus wohne tut. Derbei is de Kopp halt wichtig, wann es Hern soweit funktioniert, dass mer niemande beleidiche tut, dass mer wees was mer zu tun hat... Des is stark wichtig in meim Alter. Ich kann nit klaae. Mit de Kinner in Deutschland tu ich oft telefoniere, e älteri Frau fiehrt mer de Haushalt un git owacht uf mich. De Mensch macht un macht... solang er kann!“

Schadat un zu unsrer Pipatsch“.


Aus der Richterzeit – e Schwob mitm Herz ufm richtiche Fleck!

Zwaa Jahr druf sin ich zum gleiche Anlass wieder mitm Vetter Fredi Mühlroth in Lenauheim zammkumm. Mir han iwer so manches vun frieher un vun heizutach verzählt. De Vetter Fredi is in Fahrt kumm:

„Ich war johrelang Richter un Vizerichter do in Schadat. Als solcher han ich mit de Verwaltungsprobleme die meischi Arweitt ghat. In dere Zeit sin Brunne gebort, die Gehsteije asphaltiert gin, Plaschter raus, Beton gemacht, Strooße gebaut, vun Hatzfeld doraus, dann is die Strooß Schadat – Bogarosch gschottert wor. Efter han mer Ufträch ausfiehre misse, grad wann uns die zuwider ware un nit gepasst han. Es war e scheeni, reichi Gemeinde. Die meischte Bewohner ware Schwowe. In seller Zeit, des ware die 70er Johre, hat unser Leit schon es Deitschlandfiewer gepackt ghat. Sie han jo vill bleiche misse, bis se die Einreise ghat han, sie sin schon mit eener Schuldascht ufm Buckl vun derhem fort. Es erscht die jingre Leit, sie han so staat un staat ihre Angeheerliche nausghol. Ich war eener vun de Letschte, wu gang is in de 90er Johre. Was is mer dann anres iwerich geblieb? Die Kinner ware schon längscht fort, un do hucke bleiwe, des han ich a nit wille.“

Es sin jo fascht ke Leit me do, 4898 Persone insgesamt in Lenauheim, Bogarisch un Grawatz, laut Volkszählung 2011. Zu meiner Richterzeit han mer total 8000 Einwohner ghat. Jetz is 30 Prozent vun der Jugend im Ausland. Es stehn vill Heiser leer, es is kenner do, wu die gudi Erd verarweite sellt. Die wu do sin, sitze liewer uf der Gass un 'spautze'. Mir ware die letschte Johre schon arm dran. In de 80er hat mer schon bemerkt, es geht abwärts. Domols han mer als Gemeinde noch fünf Millione Umsatz ghat. Selmols is gsaat gin: macht patriotischi Arweitt. Un ob die Leit han wille oder nit – es is vill 'freiwillich' gearweitt gin“.

Helena Alba



De Vetter Fredi vor paar Jahr in Lenauheim während eem Gspräch iwer die Pipatsch

Bild: Zoltán Pázmány



Mühlroth-Familienbild ausm Jahr 1935

Bild: privat

De Vetter Fredi verzählt

Auszüge ausm Lenauheimer Heimatbrief 2007

Bei meim Spazeergang dorchs Dorf, dorch die Gasse un ums Dorf, hann ich ee Vergleich gmach, wie des Dorf vor 30 Jahr ausgshaft hat, un wie es jetz do steht. Ich war iwerrascht, fascht jedi Kaul hatt Wasser, vor Johre ware se alli ausgetrockelt, die Leit saan, weils enn de letschte Johre vill gereent hatt. Die Akazebeem rums Dorf senn weck, ausgmach forr verbrenne, des es em Wenter die greschti Not, weil die Leit ke Holz oder Kohle zu kaaf grien, oder ke Geld zum kaaf hann. Manche saan, se hann schon die Kukruzkolwe metsamt de Keere em Owe verbrennt...

De Friedhof es scheen, sauwer, die Weche frei von Gras un Wildnis, ach die Kappel es en Ordnung, die Sitzbenk em Hauptwech senn gut forr eh bisssl sich ausruhe. Die Hauptgass, Wertsgass un Kerchegass, es Zentrum vom Dorf, wu jo die meschte Leit wohne, schau schon besser aus, es senn schon vill Heiser wo mer gsieht, do beweht sich wass, aach die Gärten senn verarweit. Die Heiser wie: Gemeindefhaus, Kerch, Museum, Schul, Kulturheim (Grosswertschul), Krieger- un Lenaudenkmal, es alles en Ordnung. Meer Lenauheimer kenne noch zufriede senn un aach stolz off unser Dorf un

Friedhoff, enn anri Derfer enn der Umgebung schauts vill schlechter aus. Meer kenne norr Dankscheen saan an alli unser Lenauheimer, die methelfe, for die Ofrechterhaltung de Kerch un besonderscht vom Friedhoff, de wo meer Schadater Kerchof nenne...

Die paar Schwowe wass noch lewe, senn meischtens schon alt, misse met dem zufriede senn wass se hann un vielleicht aach grien. Wer bissl Geld hatt, kann sich alles kaafe, Brot griehn se täglich aus Bäckereien von Lowrin, Bogarosch, Perjamosch un Hatzfeld gebrung. Es Wasser es ke Problem, es kommt jetzt dorch die Rohre enns Haus, dorch

die nei Wasserleitung. Bei der hat die HOG Lenauheim ee wesentliche Beitrag geleist, des wor ee Projekt von de Südsteirische Rumänienhilfe e.V. Strom es aach ohne Unnerbrechung vorhanden, es get schon einige Leit, die wo neie Badezimmer installiert han un dementsprechend lewe.

Zum Schluß meeht ich noch saan, dass die Leit, e jeder no seiner Meeglichkeit, so langsam aanfange etwas zu bewehe, em Haus, Garte. Jedes mol, wann meer hemmfahrt, gsieht mer ee kleeni Verännerung, es wackelt langsam, es beweht sich was.

Alfred Mühlroth, ufgschrieb im Jahr 2006